

彌勒尊佛經

持經弟子盧文輝結集

三一教主言。古稱彌勒佛為布袋和尚者。何也。而說者乃以布袋之大。足以包虛空也。聞者惑之。然虛空最大。且不可以大名之。即是天地。尚在虛空之內矣。而曰

布袋之大。足以包虛空也。豈其布袋之大。而有大於虛空乎。而所謂布袋者。特借名爾。老子曰。有物渾成。先天地生。豈先天地之渾成者。亦有物與。而所謂物者。亦借名爾。或者以包之一字。乃是賺語。而余則以包之一字。實為密說。夫既謂之

密矣。則亦惡得而說之。然而虛空也。虛空而非虛空也。非虛空也。非虛空而非不虛空也。虛空且不得而說之矣。而況非虛空乎。非虛空且不得而說之矣。而況非不虛空乎。然其所以能包虛空者。其布袋乎。其非布袋乎。其非布袋而借名之以為布袋

乎。即有佛出世。而非身大身。果足以包
虛空矣。而其所以借名以為布袋者。則亦
不能以之而語人也。子思曰。語大天下莫
能載焉。說者以為大無不包。而其所謂大
無不包者。豈非其道之寬於虛空。而能包
虛空者乎。

爾時

三一教主。欲重宣此義。而又說是經曰。
我之身非大也。我之身充滿於法界矣。我
之腹非大也。我之腹包羅乎法界矣。我之
身充滿於法界。我之身小於其腹。我之腹
包羅乎法界。我之腹大於其身。我之身抑

又小矣。我之身充滿於毛髮。我之腹抑又大矣。我之腹包羅乎虛空。虛空空也。而不空於天地。天地不空也。而空於虛空。虛空空也。而不空於毛髮。毛髮不空也。而空於虛空。虛空也。天地也。毛髮也。孰空也。孰不空也。孰空而空也。孰空而

不空也。孰不空而空也。孰不空而不空也。
孰空空而空也。孰空空而不空也。孰空不
空而空也。孰空不空而不空也。孰不空空
而空也。孰不空空而不空也。無空也。無
不空也。無空而空也。無空而不空也。無
不空而空也。無不空而不空也。無空空而

空也。無空空而不空也。無空不空而空也。
無空不空而不空也。無不空空而空也。無
不空空而不空也。然而又何以謂之是空而
不空也。蓋只此不住。只此是空。是空不
空。即是真空。即是真空。則五臟六腑空
也。四肢百骸空也。八萬四千毛竅空也。

天地空也。日月星辰。雨風露雷空也。山川流峙。昆蟲草木空也。五臟六腑空歟。五臟六腑不空而空也。四肢百骸空歟。四肢百骸不空而空也。八萬四千毛竅空歟。八萬四千毛竅不空而空也。天地空歟。天地不空而空也。日月星辰。雨風露雷空歟。

日月星辰。雨風露雷不空而空也。山川流
峙。昆蟲草木空歟。山川流峙。昆蟲草木
不空而空也。空也。不可得而空之。不空
也。不可得而空之。空也。不可得而不空
之。不空也。不可得而不空之。有空也。
有不空也。無空也。無不空也。有其空。

斯有不空矣。無其空。斯無不空矣。

真言曰

彌勒尊佛是我體

彌勒尊佛是我心

我體即是彌勒體

我心即是彌勒心

我與彌勒無二體

我與彌勒無二心

彌勒與我無二體

彌勒與我無二心

我是開天都統行法大師。無始以來。一人而已。釋迦與我比肩。諸極在我下方。我今現補釋迦佛位。龍華三會。普度人天。南無當來下生彌勒尊佛。

召集人 朱金坤

校訂 盧國濱 林如實

參校 陳性清 陳文樵 陳亞椿 陳麗星 許良生 李洪宗

黃文遠 黃秀英 王建設 凌朝暉 吳玉先 林坤林

李應金 溫明耀 鄭燦爐 鄭欽貴 張國章 邱添水

李德清 遊玉波 林瑞祿 劉文鳳 李金林 陳玉鳳

陳文玉 蔡國亮 李麗萍 曾洪德 曾秀瓊 朱金坤

排版打字 劉新尾 陳性清 鄭燦爐 鄭欽貴

捐資人 楓亭興華堂門人 朱金坤 徐良英（陸萬元）

蓋尾清山祠門人 林存芳（壹萬元）

貳零貳零年正月